



ATAUNGo UDALA

Ataunen hileta eta omenaldi zibilak egiteko ordenantza.

AITZINSOLASA

Ataungo Udala ideien sistema laizistaren alde agertzen da, eta sistema horren alde egiten du, laizismoa kontzientzia askearen aldeko mugimendua dela ulerturik. Eta, ondorioz, gizarte politiko bat eratzearen defendatzaile da, herritar bakoitzak eta guztiek kontzientzia askea izateko eta adierazteko aukera izan dezaten.

Erlijiorik gabe bizitzea aukeratu duten herritarrei zeremonia duina eta pertsonala eskaintzeko beharretik sortu da hil ondorengo hileta edo omenaldi zibilak egiteko behar soziala, herritar horiek bizitza ulertzeko duten modua errespetatu egin behar baita.

Hori dela eta, Ataungo Udalak gizartean gero eta eskaera handiagoa duen behar bati erantzun nahi dio.

Ordenantza honen helburua da, beraz, Ataungo gizarte zibila osatzen duten familiek, adiskideek, erakundeek edo taldeek beren hildakoak omentzeko edo agurtzeko egin nahi dituzten ekitaldiak baimentzeko arauak ematea, persona horien ekarpenak edo balio etikoak nahi gizatiarrak aitortze aldera.

I.KAPITULUA

HASIERA

1. artikulua.

Ordenantza honen helburua da erregulatzea Ataunen hileta eta omenaldi zibilak egiteko lokal eta espazio publikoen erabilera eta hartarako baimena.

2. artikulua.

Alkateak edo berak izendatutako zinegotziak emango du baimena, 5.2 artikuluan finkatutako lokalak eta espazioak erabiltzeko, aldez aurretik Ataungo Udaletxeko Erregistroan eskaera aurkeztuta.

3. artikulua.

Hileta eta omenaldi zibilak egiteko eskaerak Ataungo Udaleko Alkatezara zuzendu behar dira, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legeak aurreikusitako moduren batean.

4. artikulua.

Hileta eta omenaldi zibilak egiteko eskaeren tramitazioa zirkunstantziek eskatzen duten arintasun printzipioen arabera egingo da eta eskumena duen pertsonarengana helaraziko dira hark erabakia hartzeko.

5. artikulua.

Eskaerek honako datu hauek eduki behar dituzte:

- Ekitaldia ospatzeko baimena eskatzen duen pertsonaren izen-deiturak, helbidea eta identifikazioa.
- Hildako pertsonaren izen-deiturak.



ATAUNgo UDALA

- Heriotza ziurtagiria.
- Hileta eta omenaldi zibila egiteko lehentasunezko eguna, lekua eta ordua. Udalak ahal duen neurrian aintzakotzat hartuko ditu eskatutako data eta ordua, beti ere eskaeren aurkezpen ordenari jarraituz. Aipatu ordena aldatu ahal izango da zirkunstantzia edo kasu berezietan, beti ere behar bezala arrazoituta.
- Ekitaldiaren gutxi gorabeherako iraupena.
- Eskaera lekua eta data.
- Eskatzailearen sinadura eta/edo bere borondatearen benetakotasunaren egiaztapena edozein baliabidez.
- Ekitaldiaren azalpen laburra eta erabiliko den materialarena (mahaiak, aulkiak, megafonia).

Oro har, ospakizun hauek hurrengo eraikin edo espazio publiko hauetan egingo dira:

- Aia auzoan:
 - Erroipe Aterpea
 - Auzoko plaza
 -
- San Gregorio auzoa:
 - San Gregorio elkarguneko aretoak (Aretza aretoa eta Muski aretoa)
 - San Gregorioko plaza.
- San Martin auzoa:
 - Udaletxeko batzar aretoa.
 - Herri Antzokia.
 - San Martingo plaza.

6. artikulua.

Eskaerak ez baditu betetzen aurreko artikuluan ezarritako baldintzak, interesatuari errekerituko zaio ahalik eta lasterren, ekitaldia baino lehen edo ondoren, konpontzeko egindako hutsegitea edo aurkezteko eginduzko dokumentuak.

II. KAPITULUA

INSTRUKZIOA

7. artikulua.

Hileta edo omenaldi zibilaren ekitaldi eguna eta ordua alkateak edo berak ahalmendutako zinegotziak finkatuko ditu, hartarako irekitako espedientea aurretik dela.

Instrukzioa eskaeren aurkezte ordenari jarraituz egingo da eta eskatzaileek emandako lehentasun ordena ahal den guztian errespetatuz. Ordena hori aldatu ahal izango da aparteko eta premia larriko zirkunstantzia objetiboak gertatzen direnean. Edozein kasutan, aparteko eta premia larriko izaerak behar bezala arrazoituta egon behar du eta beren eskubidean aldaketa pairatu dutenei entzun egin beharko zaie.

8. artikulua.



ATAUNgo UDALA

Hileta eta omenaldi zibila zein lokaletan edo Udalerriko zein espaziotan egingo den alkateak edo berak ahalmentutako zinegotziak erabakiko du. Oro har, 5. Artikuluan finkatuetakoa bat izango da. Aparteko egoeretan baimena eman ahal izango da beste lokal edo espazio publikoren bat erabiltzeko.

9. artikulua.

Hileta eta omenaldi zibilak edozein egunetan egin ahal izango dira, 9:00etatik 14:00etara eta 17:00etatik 20:00etara.

10. artikulua.

Erabiltzen diren udal baliabideen erabilera doakoa izango da.

11. artikulua.

Hileta edo omenaldi zibilak dirauen bitartean udal langilea kanpoaldean egongo da, ekitaldia bidezko moduan gauzatuko dela bermatzeko.

III. KAPITULUA

ESKUBIDEAK ETA BETEBEHARRAK

12. artikulua.

Kontserbazio egokia bermatzeko, baimena duen titularrak izango du erantzukizuna, ekitaldiarengatik udal ondasunetan gertatzen diren kalte eta galeren aurrean.

13. artikulua.

Hileta eta omenaldi zibilaren ekitaldia egingo den tokia modu berezian apaindu edo atondu nahi badute familiakoek eta/edo adiskideek, udal arduradunari garaiz jakinarazi behar diote, bidezko erabakiak har ditzan. Apaintze edo atontze lanek tokiaren harmonia eta ezaugarriak errespetatu behar dituzte eta sortzen dituen gastuak haien kargura izango dira. Ekitaldia gauzatzeko zerbitzu osagarriak pertsona interesdunak emango ditu eta bere kargura izango dira. Halere, Ataungo Udalak haien gainbegiraketa egingo du.

Baimena duen titularrak izango du erantzukizuna, ekitaldiarengatik udal ondasunetan gertatzen diren kalte eta galeren aurrean.

14. artikulua.

Ordenantza honetan aurreikusten ez denaren aurrean, udal arduradunen aginduei jarraitu beharko zaie.

XEDAPEN GEHIGARRIA

Baimena ematen zaio Ataungo Udaleko Alkatezari, ordenantza hau aplikatzeko beharrezkoak diren jarduketak Aurrera eramateko.

AZKEN XEDAPENA

Ordenantza hau, behin betiko testua Gipuzkoako ALDIZKARI OFIZIALEAN argitaratu ondoren eta TJOLaren 65.2 artikuluan aurrikusitako epea igarotzen denean jarriko da indarrean.